

# SAMÞYKKT

## um búfjárhald á Húsavík.

### I. KAFLI

#### Almenn ákvæði.

##### 1. gr.

Samþykkt þessi er sett til að tryggja skipulag, stjórn og eftirlit með búfjárhaldi á Húsavík, koma í veg fyrir ágang búfjár á lóðir bæjarbúa og vernda gróður á landi kaupstaðarins. Samþykktin á einnig að tryggja að hús fyrir búpening, umhverfi þeirra og önnur aðstaða sé þrífaleg og í samræmi við kröfur opinberra yfirvalda.

##### 2. gr.

Búfjárhald (alifugla, geita, hrossa, loðdýra, nautgripa, sauðfjár og svína) er óheimilt í Húsavíkurkaupstað, nema með sérstöku leyfi bæjarstjórnar.

Öll lausaganga búfjár í landi Húsavíkur er óheimil.

##### 3. gr.

Nefnd sem skipuð er þrem fulltrúum, einum frá Húsavíkurkaupstað ásamt trúnaðarmönnum búfjáreigenda, sbr. 10. gr. samþykktarinnar, skal gera tillögu til bæjarráðs um hámarksfjölda búfjár í landi Húsavíkur.

##### 4. gr.

Sá sem hyggst sækja um leyfi samkvæmt 2. gr. skal senda skriflega umsókn til bæjarráðs. Í umsókninni skal gera grein fyrir tegund og fjölda búfjárins, geymslu þess og öðru sem máli skiptir um öryggi þess og aðhald.

Telji bæjarráð að skilyrði fyrir leyfisveitingu séu fyrir hendi veitir það leyfið. Leyfið má veita í tiltekinn tíma eða tiltaka ákveðinn frest til afturköllunar. Leyfið er háð gildandi samþykkt um búfjárhald á hverjum tíma og er gefið út á nafn og ekki framseljanlegt.

##### 5. gr.

Bæjarstjórn getur ákveðið að búfjáreigendur skuli árlega greiða leyfisgjald fyrir búfé sitt. Við ákvörðun gjaldsins skal bæjarstjórn leita staðfestingar landbúnaðarráðuneytisins, sbr. 12. gr. laga um búfjárhald nr. 46/1991.

##### 6. gr.

Byggingarfulltrúi skal halda skrá yfir lönd sem úthlutað er til beitar og slægna. Umsóknum um land til grasnytja fyrir búfé skal koma til byggingarfulltrúa sem úthlutar leyfum, eftir umsögn umhverfismálaráðs. Leyfi eru gefin út á nafn og eru óframseljanleg.

##### 7. gr.

Enginn má halda búfé, nema hann hafi yfir það hús sem samræmist kröfum opinberra yfirvalda. Sama gildir um allt umhverfi húsanna. Leyfishafi ber ábyrgð á því að hann hafi beitiland handa búfé sínu og fóður, svo og allri meðferð búfjárins.

##### 8. gr.

Eigandi búfjár ber ábyrgð á að búféð valdi ekki tjóni eða óþrifum. Eigandi skal ganga þannig frá taði er frá skepnunum kemur, að ekki valdi óþægindum eða óþrifum.

## 9. gr.

Ef leyfishafi brýtur ákvæði í samþykkt þessari má afturkalla leyfið, enda hafi leyfishafi ekki sinnt áður veittri viðvörun.

Hvern þann búfénað sem sleppur úr vörslu skal taka hvar sem til hans næst og færa í örugga vörslu, sem búfjárefartilitsmaður (byggingafulltrúi) sér um. Eiganda skal tilkynnt um gripi sína og gert að sækja þá og greiða áfallin kostnað, svo sem tjón og kostnað við handsömun. Hafi eigandi ekki hirt um að sækja gripi sína eða greiða áfallinn kostnað innan tíu daga, er heimilt að svipta viðkomandi leyfi til búfjárhalds á Húsavík. Við ítrekað brot á þessum reglum missir leyfishafi rétt til búfjárhalds og verður gripum jafnframt ráðstafað í samræmi við 11. gr. laga um búfjárhald nr. 46/1991.

## II. KAFLI

## Um búfjárhald.

## 10. gr.

Fjáreigendafélag Húsavíkur og Hestamannafélagið Grani á Húsavík skulu hvort um sig tilnefna trúnaðarmann, sem í samvinnu við byggingafulltrúa og búfjárefartilitsmann, sbr. 9. gr. laga nr. 46/1991, fylgjast með að leyfður fjöldi sauðfjár og hrossa fari ekki yfir sett hámark og umsækjendur hafi hús, möguleika til fóðuröflunar og aðra nauðsynlega aðstöðu, svo sem beitiland.

## 11. gr.

Nautgripi skal hafa á afgirtum túnnum eða löndum og bera eigendur alla ábyrgð á að þeir sleppi ekki út af löndum þeirra.

## 12. gr.

Utanhúss skulu alifuglar og svín vera í stíum, búrum eða á vel afgirtum svæðum, en löddýr skulu ætíð vera í búrum, og bera eigendur alla ábyrgð á að þau sleppi ekki út.

## 13. gr.

Vörslu geita utanhúss skal hverju sinni hagað í samráði við umsjónarmann búfjárhalds, en það er ávallt á ábyrgð eiganda að gæta þess að þær sleppi ekki lausar.

## III. KAFLI

## Um byggingar gripahúsa og lönd til grasnytja.

## 14. gr.

Byggingar gripahúsa eru einungis leyfðar á svæðum sem skipulögð eru fyrir búfjárhald. Þau gripahús sem fyrir eru í bænum, á svæðum sem ætluð eru til annarra nota en búfjárhalds samkvæmt aðalskipulagi, skulu fjarlægð þegar bæjarráð samþykkir það, með eins árs fyrirvara. Óheimilt er að byggja við þau, endurnýja eða endurbyggja, en gæta skal þess að þau líti vel út.

## 15. gr.

Einstaklingar og félög hesta- og fjáreienda, sem hafa lönd til grasnytja, skulu leitast við að viðhalda gróðri landsins og efla hann, m.a. með áburðargjöf eftir þörfum, og gæta þess að löndin verði aldrei ofbeitt. Byggingafulltrúi og/eða umhverfismálaráð geta krafist úrbóta og gert tillögu til bæjarráðs um friðun lands ef ástæða þykir til.

IV. KAFLI  
Ýmis ákvæði.

16. gr.

Brot á samþykkt þessari varða sektum. Með mál út af brotum skal farið að hætti opinberra mála.

Samþykkt þessi sem samin er og samþykkt af bæjarstjórn Húsavíkur, staðfestist hér með samkvæmt lögum um búfjárhald nr. 46 25. mars 1991 til þess að öðlast þegar gildi og birtist til eftirbreytni öllum þeim sem hlut eiga að máli. Jafnframt er úr gildi felld reglugerð um búfjárhald í Húsavík nr. 6 3. janúar 1989.

*Ákvæði til bráðabirgða:*

Ákvæði 2. mgr. 2. gr. samþykktarinnar um bann við lausagöngu búfjár kemur til framkvæmda þegar land Húsavíkur hefur verið girt.

*Landbúnaðarráðuneytið, 23. desember 1993.*

**Halldór Blöndal.**

*Jón Höskuldsson.*

## GJALDSKRÁ

**fyrir hundahald í Húsavíkurkaupstað 1994.**

1. gr.

Gjald fyrir að halda hund í Húsavíkurkaupstað sbr. 2. gr. c. staflið samþykktar frá 21. nóvember 1991 skal vera kr. 7.000 á árinu 1994.

Gjaldið greiðist fyrirfram á gjalddaga 1. maí, en eindagi er 1. júlí. Innifalið í leyfisgjaldinu er hundahreinsunargjald.

2. gr.

Handsömunargjald skv. 3. gr. samþykktarinnar skal vera kr. 3.000 í fyrsta skipti, en síðan hækkar það í kr. 6.000 ef til handsömunar kemur aftur.

3. gr.

Um vexti af vangreiddum gjöldum skv. gjaldskrá þessari gilda almennar reglur.

4. gr.

Gjaldskrá þessi, sem samin er og samþykkt af bæjarstjórn Húsavíkur skv. 22. gr. laga nr. 81/1988 um hollustuhætti og heilbrigðiseftirlit með síðari breytingum, öðlast þegar gildi.

*Heilbrigðis- og tryggingamálaráðuneytið, 29. desember 1993.*

**Guðmundur Árni Stefánsson.**

*Sólveig Guðmundsdóttir.*